

## 第七章 釋古籍

簡五九 長七八 纒寬七 纒厚二 纒

缺亦欲毋加諸人子曰賜非

此簡上殘，現存「亦欲毋加諸人子曰賜非」十字。按論語公冶長章：「子貢曰：我不欲人之加諸我也，吾亦欲無加諸人。子曰：賜也，非爾所及也。」今以漢簡校之，無作毋，賜下無也字。唐開成石經與今本同，則增也字已遠在唐前矣。按此簡出羅布淖爾古烽燧亭南兵房中。在北兵房中同時出土者，有黃龍、河平、元延諸年號，則此簡書寫當亦在斯時。按論語序云：「漢中壘校尉劉向言魯論語二十篇，皆孔子弟子記諸善言也。太子太傅夏侯勝、前將軍蕭望之、丞相韋賢及子玄成等傳之。」披夏侯勝爲漢宣帝時太傅，蕭望之宣帝末爲前將軍，韋賢在宣帝本始三年爲丞相，玄成元帝建昭中爲丞相，是魯論在宣、元之際，已盛行一時矣。又有齊論語二十二篇，多問王知道二篇，其二十篇中，章句頗多於魯論。又有張侯論者，爲張禹所改訂。漢書張禹傳云：「初禹爲師，以上難數對已問經，爲論語章句獻之。禹先事王陽，後從庸生，采獲所安，最後出而尊貴，由是學者多從張氏，餘家寢微。」按張侯論二十一篇，據隋書經籍志云：「張禹本授魯論，晚講齊論，後遂合而考之，刪其煩惑，除去齊論問王知道二篇，從魯論二十篇爲定，號張侯論。漢末鄭玄以張侯論爲本，參考齊論，古論而爲之注。」按張禹爲相，在河平四年；建平二年卒。按西域自宣帝神爵二年置都護，設百官，內外交往常密。黃龍元延間，執政者又皆傳論語，則論語亦必於此時傳播至西域。故此簡所寫論語，或爲當時所通行者，迄今已一千九百餘年矣。又有古文論語者，劉向曾見之。但向校中秘書，在河平四年，未必即傳於西域。論語何晏序云：「古論惟博士孔安國爲之訓解，而世不傳。」可證也。今本論語乃何晏根據鄭玄注本而爲集解。鄭玄就魯論篇章，考之齊、古爲之注。鄭玄東漢末年人也。故此簡所書論語，不惟在鄭玄之前，且在劉向之前矣，甚可貴也。